

posito in mano del nobil nostro sier Marco Minio, con certa obligation de investir in stabile, sia dichiarito che quando se farà la restitutione de li danari deputati a l'ultimo imprestado, siano dati li danari in mano del prefato sier Marco Minio, acciò se possi far de essi quello a che sono destinati et obligati, come fu dichiarito *etiam* de li ducati 500 prestati, che sono tratti del corpo preditto.

Dechiarando che passati li 6 mesi, el prefato soracomito possa apresentarsi al proveditor de la armata, over rezimento de Corfù o Zante, et farse far la cerca, presente quello de li sopradetti che li farà essa cerca. Et bollato el libro andar debba in Candia et, presente quel rezimento, debba saldar la zurma et presentar la galla *cum* le artellarie, munition et armizi sui. Et hauta la fede de quel rezimento de la exbursion, sia fatto creditor secondo la forma de la supplication sua, come si conviene. El qual rezimento *etiam* debba dar notitia quello che monta el spazo per li 4 primi mexi, aziò se possa far creditor, come è sopra ditto, e dovendo venir, *cum* ogni diligentia sia fatta subito la cerca per el proveditor, et cussi de mexe in mexe, et le zerche mandate de qui a l'armamento. Et non trovando el proveditor, farse far la prima zerca dal rezimento da Corfù. Et siano tenuti del sopraditto imprestado ducati 3400 ad instantia del sopraditto signor de Pario per la causa prefata, da esser dati però quanto el sarà creditor, et consegnati al nobil homo sier Marco Minio, come è sopraditto.

† De parte	143
De non	7
Non sincere	14

22* *Serenissime Princeps et illustrissimo Dominio.*

El signor Nicolò de Pario nobile vostro da chà Venier, desideroso, come bon fiol et subdito di questo illustrissimo Stato, aiutar, per quanto si extendeno le poche forze sue, la patria et dimostrà el bon animo et voler suo verso quella, offerisse a la Sublimità vostra de armar nel ditto loco una galla de zurme bone et sufficiente et quelle cernir, che la ditta galla sarà ben armata. *Ac etiam* oltre di questo, el nobil homo sier Lorenzo Venier, fradello del prefato signor Nicolò, andar lui a servir la Signoria vostra per sopracomito de la ditta galla, offerendo, atrovandosi haver qui quel suo gruppo de danari del qual zà ne ha principiato a servir la Serenità vostra de ducati 500 de ditti danari de esso gropo,

dar tanti danari che pagi la prima paga a le dette zurme, et questo ad imprestado a la illustrissima Signoria, da esser fatto de quanto el sborserà creditor, et deputatoli la restitution sopra el presente imprestado, come de li ducati 500 *etiam* li è sta fatto. Et ditta galla sia deputata per mesi 6 solamente et quel manco che accadesse. *Item*, se offerisse *etiam*, se al tempo del disarmar de ditta galla, in capo però de li mesi 6, la illustrissima Signoria non havesse il modo de disarmarla, zoè de darli le soe refusure, el ditto sier Lorenzo dar et exbursar lui, de li danari del ditto suo gruppo, tanta summa, quanta rizercarà il saldar de ditte refusure de preditti mexi, da esser fatto creditor oltra li soprascritti *etiam* de questo, et deputatoli la restitution sopra el ditto imprestado *modo quo supra*, *cum* condition che lui sier Lorenzo sopracomito possi haver el titolo de soracomito, et quello poterli esser dato come li altri sopracomiti de Vostra Serenità. *Item*, se offerisse el prefato sier Lorenzo tuor el cargo del mandar l'arsil de là in quelle bande et retrovar li homini el condurà, se cussi piacerà a la illustrissima signoria vostra dargi la ditta galla bona et sufficiente, ben conza, et ben coredada, et ben in ordine, perchè le zurme saranno di tal sorte, che la Sublimità Vostra potrà servirsi de ditta galla ad ogni bona impresa, perchè sono homeni tutti pratici et experimentadi in molte simel faction. Et in caso che 'l passasse li mexi sei che non si atrovasse uno capo de li facesse la cerca, lui sopracomito possi andar dal primo rector de Vostra Serenità et li farse far la cerca et disarmar la ditta galla. Et questo fa per trovar valenti homeni che montino sopra ditta galla, havendo la ferma de mesi 6 solamente, il che redunderà *etiam* a beneficio di Vostra Serenità, perchè volendo da poi armare li qualehe altra galla, le zurme saranno prontissime a servir quella, *cuius gratiae*, etc.

24) *Questa è una condanason fatta a dì primo de l'istante nel Conseio di le do Quarantie, zoè Criminal et Zivìl vechia, per el pìedar di nobil homeni sier Piero Boldù et sier Marchiò Michiel avogadori di Comun contra el nobil homo sier Michiel Trivixan fo di sier Nicolò, avogador di Comun.*

Che el ditto sier Michiel sia privado di tutti officii, benefici et congegi nostri in perpetuo, et sia

(1) La carta 23* è bianca.